

**Naalagaaffiit Peqatigiit Innarluutilinnut isumaqatigiissutaata atortuulersinneqarneranut aatillugu ussersornermik atuisut, innuttaasullu allat attaveqarniarnerminni ajornartorsiutillit isumaqatigiissummut ilaatinneqartut, nakorsiarneranni malitseqartitsinermit kiisalu nangittumik katsorsarneqarnerannut atatillugu allakkatigut nassuiaammik tigusisalernissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut. (Inatsisartunut ilaasortaq Agathe Fontain, Inuit Ataqatigiit)**

### **Akissuteqaat**

(Peqqissutsimut Naalakkersuisoq, Doris Jakobsen)

### **Siullermeerneqarnera**

Naalakkersuisut sinnerlugit siunnersuut pillugu qamannga pisumik qujavunga.

UKA2012-imi Kalaallit Nunaata inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat akuersaarlugu ilannguffigaa. Taassuma qulakkeertussaavaa allatulli inuit tunngaviusumik pisinnaatitaaffii inuit innarluutillit pisinnaatitaaffigisagaat.

Inatsisartuni aalajangiiffigisassatut siunnersuummut naleqqiullugu isumaqatigiissutit imaraa paasissutissiinermit maleruagassat taakkualu pissarsiarinnaanissaat.

Tamanna isumaqarpoq inuit innarluuteqartut piginnaanermikkut killeqalersimasut peqqissaanermi sulisumik allatulli attaveqateqarsinnaanerata pisinnaanissaa qulakkeerniarlugu Kalaallit Nunaat iliuuseqassasoq. Tamanna pisinnaavoq ussersorluni nutserisumik peqartitsinikkut aammali allanik atorineqarsinnaasunik peqarnissaq pissusissamisuusaaq, tamanna kingusinnerusukkut iserfigisavara.

Nuannaarutigalugu paasissutissiissutigisinnaavara ussersorluni attaviginnittartut innuttaasullu allat attaveqatigiinnermik ajornartorsiutillit nakorsiarnernermit atatillugu sullinneqarnerminni ullumikkut periarfissaqartitaammata suliarineqarnertik qanoq ingerlanneqartoq allakkatigut paasissutissinneqarsinnaammata.

Peqqissaanermi sulisut atortorissaarutit atugassiissutigineqartut attaveqatigiinneq pitsaanerpaaq anguniarlugu atortarpaat attaveqatigiinnikkut ajornartorsiutit qaangerniarlugit innuttaasumillu paaseqatiginninnissaq anguniarlugu. Nakorsatut ilinniagaqassuseq nalilerneqarpat sullissinermi ussersorluni nutserisoq pisariaqartoq taava pissarsiarineqarnissaa anguniarneqassaaq. Siunnersuusiortoq isumaqatigaara, ussersorluni oqalutsimik pissarsiniarneq ajornakusoorsinnaammat. Pisuni periarfissaqanngittuni, innuttaasoq

ussersorluni nutserisumik pissarsisinnaagaanni, kingusinnerusukkut nakorsiarnissaanut aggersarneqaqqissaaq.

Ussersorluni attaviginnittartut arlallit innuttaasullu tusillassimasut namminneq nassartarpaat tapersersuisutik ussersornermik ilinniarsimasut, taakkualu kommune aqputigalugu tapiissutitut pisarpaat inissinneqarnermut neqeroorfigineqarnikkut.

Allatigut nakorsiarnermi suliarineqarnermiluunniit immikkut itisilerlugu ilitersorneqarnissaq pisariaqartinneqarpat peqqissaasut allakkatigut attaviginnissinnaapput. Tamakkua saniatigut atuagassiaaqqat allakkatigullu ilitersuutit tunniunneqartarput napparsimasut suliamik paasisaqarnissaat qulakkeerniarlugu. Nakorsiarluni nassuiaanneqarnermi nakorsap titartakkanik inuusanillu atuisinnaavoq.

Illumoorpoq siunnersuummi taaneqartoq namminerisamik inuuneqarnermut tunngatillugu ajornakusoorntuummat ilaqutarisamit allatut ajornartumik ussersorluni nutserisutut ikiorneqartariaqaraanni. Innuttaasut tusilartut allanik peqquteqarsinnaapput ilaqquttatik nassarniarlugit, assersuutigalugu napparsimanerup ingerlanerani ussersorluni nutserinerup saniatigut ilaqquttat tapersersuisinnaanerit toqqissinermillu tunniussisinnaanerit tunngavigalugu.

Naalackersuisut pingaartittuaannarpaat napparsimasunut peqqinnissaqarfimmik attaveqarniarnerminni atugassaat pitsanngorsartuassallugit. Taamaammallu nuannaarutigaa oqarsinnaagama, peqqinnissaqarfik massakkorpiaq elektronikkikkut napparsimasunik misissoriikkat pillugit allattukkanik katersuiffik atulersinniarlugu sulimmat, tassani napparsimasut pillugit allattukkat katersorneqartarput paarineqarlutillu. Taamaasillutik napparsimasut siunissami sukkanerusumik suliarineqarnertik pillugu ataatsimut allattukkanik pisinnaalissapput.

Inunnik isumaginninnermi IPIS, Kalaallit tusilartut kattuffiat KTK suleqatiginiallugu isumaqatigiissuteqarfigisimavaa ungasissumiit nutserussisinnaanermik, tusilartunut atugassarititaasut pitsanngorsarniarlugit Skype aqputigalugu ungasissumiit nutserussinermik periarfissiinikkut.

Naalackersuisut siunissami innuttaasut tusilartut peqqinnissaqarfimmut saaffiginninnerminni atugassaat pitsaanerulersinniarlugit suliniarput. Naalackersuisuttaaq peqqinnissaqarfimmi ussersorluni oqalutsinik atorfinititsinissamut periarfissat misissussavaat, Skype-ikkut ungasissumiit attaveqatigiinnikkut nutserisinnaasunik.

Kiisalu Martha – kalaallisut atuaassut –2015-imi atulersoq aqputigalugu kalaallisut allakkat atuartinneqarsinnaapput attaveqatigiinnikkut ajornartorsiutit allat soorlu ordblindit isiluttullu aamma ikiorserneqaqqullugit.

Tamanna tunngavigalugu Naalackersuisut innersuutigaat siunnersuut itigartinneqassasoq.